



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

Пренумерата в краю:

30 грошей місячно,
80 „ „ квартално,
1.50 „ „ полрочно,
3 зл. рочно.

В Америкі: 1 дол. рочно.

В Чехословакии:

2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., $\frac{1}{2}$ сто-
роны 60 зл., $\frac{1}{4}$ стороны 35 зл.,
 $\frac{1}{8}$ стор. 20 зл., $\frac{1}{16}$ стор. 10 зл.;
оголошення малы за 1 мм. 20 гр.,
в тексті 30 гр., перед текстом
40 гр. При місячном и долгом
оголошеню значна знижка.

Конто чекове Нр. 404.155.

Німеччина заняла Австрию.

Недавно, бо в попередном числі, писали мы о том, же Австрия задержуе свою державну независимость й же той ей независимости буде в разі потреби боронити Франция.

От того часу, як тото публично заявил австрийский канцлер Шушник, минул ледо тыждень, а уж положене змінило ся цілкови-то. Гитлер, по бесіді Шушника, переконал ся, же Австрия сама не захоче згодити ся на прилучене до Німеччины и штобы тото перепровадити, приказал своим войскам машеровати на Відень. Армия німецка заняла Австрию и выбрано нове правительство, зложене со сторонников Гитлера. О самом Шушникі ходят розмаиты слухы. Сут аж и такы, же Шушника убито, инши поголоскы подають, же збіжал он до Чехословакии, або до Венгрии, а ище инши говорят, о том, же жие во Відні, во власном домі, под надзором німецких войск, котры его арестовали.

Так, чи иначе, бывший австрийский канцлер Шушник, як также и президент Австрии, Микляс, не мають уж нич до сказаня, бо во Відні и в цілой Австрии рядит Гитлер. Австрия стратила свою независимость и стала ся провинциом державы німецкой.

Цілый світ ест заскоченный тым смілым поступком Гитлера, котрый не робит собі нич ани с Лиги Народов, ани с протестов Франции и Англии, ани с вытыченных по войні границ меже державами. Треба признати, же Гитлер добре доберат час на переведене своих плянов. Як перед двома роками використал он удобный момент политычного ослаблення Франции и занял приренский край, так и тепер не оминув використати случая, коли Франция мала свои политычны клопоты с выбором нового правительства и коли положене инших держав было в загалі таке, же о оружном спротиві не могло быти бесіды.

Через прилучене Австрии стае ся Німеччина незвычайно сильном державом, угрожаючом равновазі в Европі. Доціняють тот факт инши державы, а особенно тоты, котры стали ся тепер ей сусідами. Тревога повстала в першій мірі в Чехословакии, котрой полночну часть окружают тепер с двох стран держава німецка. Если Гитлер под предлогом национального единства не побоял ся заняти цілой

Австрии и позбавити ю политычной независимости, то може легко случити ся, што в его календарі дальших плянов ест выписана уж дата прилученя до Німеччины тых німцов, котры живут в ческих Судетах, а ест их там около 4 милионы. Чи ніт в его календарі и инших дат, означаючих захват других терытории сусідам, не знати, бо на разі Гитлер не здражат ся с дальшима плянами, але по нем можна ся всього сподівати, бо ест то человек сильный, свідомый своих цілей и стремячий

упорно до зреалізования своих плянов отбуровы могучой Німеччины, котра мае давати приказы цілому світу. Німеччина переживат под Гитлером часы великого розвитку и світлой могучости. Перед ним корят ся такы державы, як Англия и Франция и уступають ему на разі. Як долго буде продолжати ся таке положене, не можна предвидіти. В каждом разі Англия, Франция, а также Америка, переназначают величезны сумы на довооружене. С того можна снути здогады, же коли тоты державы, як Англия и Франция и уступають ему они Німеччині в больше рішительной формі.

Зміны на карті Европы через прилучене Австрии до Німеччины.

Німеччинна через прилучене Австрии змінила своє місце в скалі світової.

Дотепер пространство Німеччины выносило 471 тыс. км², а тепер увеличилось о 84 тысячи км. кв. и выносит 555 тысяч километров квадратных. Німеччина занимає отже друге місце в Европі по европейской Росии, выпереджаючи Францию с ей 551 тысячами километров квадр. пространства.

Поверхня цілой Европы выносит 11,423 тысячи км. кв.

Населене.

Дотепер Німеччина мала 67 милионов 330 тысяч людей, а Австрия — 6 милионов 800 тысяч. Тепер Німеччина буде числити 74 милионы 130 тысяч населения.

Европа мае 524 милионы людей, отже населене Німеччины ест сегом частью населения цілой Европы. Німеччина и ту занимає друге місце в Европі, бо перевысшат ю лем Росия.

Гитлеровскы власти арестовали в Австрии масу людей.

Перши дні гитлеровского панования в Австрии перешли под знаком террору. Велике вражене выкликала вість о том, же арестовано много высших духовных австрийских, а меже нима кардынала Відня Иннитцера. Арестованный ест также бывший вицеминистер заграничных справ др. Шмидт и инши.

Як доносят с Зальцбурга, велике вражене серед католицкого населения выкликал арест 74-літнього архиепископа Зальцбурга, Дра Жигмунта Вайтца. Он тішит ся великом популярностью серед вірных и ест знанный со своих выступлень против национальным социалистам.

Десятки тысяч сторонников „Патриотыч-ного фронта“ усунено с посад, а кто мог, збі-

жал за границу. Усунено тысячи желізнодорожных урядников.

Террор досягнул и социалистов. В копальні соли в Зальцбургу розстріляно 60 работников (социалистов).

Ось Рим — Берлин слабне. Помимо приязни меже Німеччином и Италиом, ось Рим — Берлин слабне по прилученю Австрии до Німеччины. Тепер обі тоты державы сусіднуют с собою и кость незгоды лежить в Тыролі, где населене ест мішане, зложене с німцов и италиянов. Италия гнобит німцов, які живут в италиянской части Тыроля, а на тото не позволит Гитлер и ту може закончити ся згода меже Муссолиним и Гитлером.

Смертный засуд на Рыкова и товаришей.

Процес в Москві закончил ся. Большая часть оскарженных, як то зрештом не трудно было предвидіти, была засуджена на кару смерти. Формально ест вьсо в наилучшем порядке, бо оскаржены признали ся до вьсех злочинов, яки им роблено.

Они сами подтвердили, же сут шпьонами на услугах чужих держав, шкодниками, дыверсантами и зрадниками своей отчины. Отже, што мал суд зроби́ти? Треба было вымірити им найвысшу кару, то ест кару смерти, тым больше, же и публична опиния, т. е. газеты и собрания работников, домагали ся такой кары для тых „бандытов”.

Оден Крестинский пробовал першого дня не признати ся, але через одну ноч покаял ся и на другой день співал уж як с нут о своих преступленьях и сам признавал, же заслужил на кару смерти. С того видно, же в Совітах смерть сама не ест так страшна, а страшны сут муки, яки задае ся тым людям, котрых хоче ся позбыти, а котры пробуют боронити своего жита. О тых муках оповідаєт профессор німец Ебергард Шитц, котрому чудом удало ся выдерти с преділов „большевицкого раю”. Он просидил в совітских криминалах долгий час и тепер вернул до Німеччины. Оповідаєт он, же там каждому арестованому дае ся до под-

писания готовый уже протокол, в котром ест написане, же оскарженный признае ся до каждой зашмаряной ему провиньи. Кто не хоче подписати такого протокола, того бьют гумовыма палками, або и ногами от кресла и держат так долго без ідла, спанья и питья, аж подпише вьсо, чого от него жадають.

Знаючи о том, не будеме счудованы, же и Крестинский по одной горячей ночи признал ся до вьсого, хоц знал, же где его за то-то кара смерти.

В послідном процесі были засуджены на кару смерти: 1) Бухарин, Рыков, Ягода, Крестинский, Розенгольц, Ивин, Чернов, Зубарев, Шарангович, Грынок, Желенский, Ходжаев, Икрамов, Буланов, Максимов - Диковский, Кручков, Др. Левин и Козаков. Кроме того засуджено на кару вьзницы: Раковского на 20 літ, Бессонова на 15 літ и профессора Плетнева на 25 літ. Мае ток вьсех засудженных сконфисковано.

Президия верховного Совіта СССР. отшмарила просьбу засудженных о помиловане, в виду чого вырок выконан.

В официальном комунікаті ніт назвиска Розенгольца. С того слідує додумовати ся, же або он не робил просьбы о помиловане, або тыж, што его помиловано.

Кухар, котрый може варити лем туючи стравы.

Главным режисером вьсех процесов в Совітах ест напевно Сталин. Кож то ест тот человек, котрый суміл подчинити собі населене цілой Росии и рядит в ней безподільно, высылаючи вьсех своих правдивых и мнимых противников на другой світ?

Ест ним человек сильный на правду як сталь. Хоц не мае он достаточного образования, покрыват недостатки увагом, точностю, подозрительностью и спрытом. Ест притом отважный, амбитный, талантливый и уміющий нашмарити другим свою волю. Тоты свойства выдвинули его на так высоке становиско, о яком он сам в початках ани не думал.

В р. 1917. Сталин был совсем малым чловеком. Жил на провинции и думал о том, як бы достати ся до Москвы. В р. 1918. почал писати в „Правді”. Его артыкулы звернули на него увагу Ленина, котрый почал цінити его отвагу, спрыт и силу. Але Ленин познал ся на нем скоро и не довірял ему.

Коли Зиновев поставил внесене, штобы Сталина зроби́ти генеральным секретарем большевицкой партии, Ленин не згодил ся початково на то и сказал: — не мам до него довіря. **Уважаю Сталина за кухара, котрый буде варити самы туючи стравы.**

В своем тестаменті Ленин радит усунути Сталина со становиска секретара, але Зиновев, Каменев, Рыков и други вірят в Сталина и поддерживают его. Тепер Сталин отвдячил ся им, бо приказал их вымордовати.

Позбыват ся вьсех старых, заслуженых большевиков, с котрыма давнійше сотрудничал и котры выдвинули его на передове становиско. Хоче остати сам, штобы не мати никакого противника. Але незадоволене против нему росне с каждым новым процесом. Того невдоволена не здавит уж жаден процес, ани Г. П. У. Процесы тоты сут етапами конанья самого Сталина, котрый згыне от того, чим ціле жите воювал.

Ревизия у маршала Блюхера.

В звязи с процесом Рыкова Бухарина и тов. в Москві говорят упорно о том, што в найближшом часі мае быти уничтоженный маршал Блюхер, котрого здемасковано яко противника Сталина.

Недавно, высланы через Ежова урядники Г. П. У. перевели ревизию в кватері маршала Блюхера в Хабаровску. Они показали маршалу приказ переведеня ревизии подписанный через самого Сталина. Агенты Г. П. У. по переведеню ревизии, забрали гдеякы документы и вернули до Москвы.

Велику сенсацию выклакала вість о том, же арестовано в Хабаровску генерального секретара комуністичной партии на Далеком Вьсході, Варейкиса. Ест то перший случай арештованья близкого приятеля маршала Блюхера через Г. П. У. Дотепер люде, стоячи вокруг Блюхера были поза всякыма подозреньями и не было силы, котра бы могла против ним

выступити. Варейкиса арештовано за поддерживане сношень с Рыковым и Бухарином, а также за шпьонство в користь Японии.

В Москві арестуют дальше сторонников Троцкого, Бухарина и вьсех, кого подозривают, же выступат против Сталина. Чи однак потрафят вьсех арестовати? Здае ся, же ні, бо против Сталина звертають ся уж вьсі. Дост мають уж пролятой кырви, дост жертв кровожадного деспота. **Наконец може прийти черга и на него.**

Мають перенести столицу с Берлина до Мюнхена в Баварии. В политичных німецких кругах обігають поголоскы, же Гитлер хоче оголосити нову констытуцию для новой Німеччины и перенести столицу с Берлина до Мюнхена в Баварии.

Новый процес в Москві.

Ледво закончил ся процес Рыкова и тов а уж Вышинский приготавлиет новый акт оскаржения против парунадцетью совітским достойникам.

Новых оскарженных мае быти 23-ох, серед них мають найти ся бывши консулі совітскы в Токио, Варшаві, Гельсинках, Букарешті и Та-лині.

Але ище перед тым процесом мае отбыти ся процес против вождам червоной армии, меже иншими, против генералови Дыбенкі. Не ест выключене, же его долю поділят **Ворошилов, Блюхер, Буденный** и инши, о котрых бесідує ся чимраз частійше, же сут врагами и шкодниками народа.

Дайме опеку малым дітям.

В зимі мати опекує ся дітьми и учит их. Але як прийде яр і літо и роботы в поли, діти остает без присмотра и опеки и проводят час, як сами уміють. Таке оставляне дітей без догляду отбиват ся зле на вьхованю дітей. Они учат ся нераз брідких слов и набирають брідких навывок. А и не одно несчастье и каліцтво дітей повстало от того, же оставлено діти дома без присмотра.

Штобы того вьсого уникнути треба заклапати то селах дітячи садкы. Дітячима садками называєме своего рода школу для малых дітей от 3—7 літ. Не ест то властиво школа, бо там не учат читати, писати и раховати. Ест то радше вьховавчий заклад, до котрого приходят діти рано и остает в нем аж до вечера. Через цілый тот час бавят ся они, співають у учат ся вершиков под руководством вынанятой на тоту ціль учителькы. Учителка уважат, штобы дітям не стало ся нич злого, штобы они бавили ся красно, штобы были чисто вымыты и красно учесаны.

На полуденок могут діти вертати домо, або тыж остает в дітячом садку цілый день. В том другом случаю потреба вынаняти кроме учителькы ище кухарку, котра буде дбати, штобы діти о своем часі достали істи.

В садку том учат ся діти также молитвы и проводят час под каждым взглядом користно для себе и для родичей. Невеликий выдаток, який родичи мусят понести, штобы оплатити поміщене и учительку, напевно зверне ся, бо мати, не маючи на голові дітей, потрафит ліпше допильновати господарства и зробит значно больше як при дітях, до котрых треба ся все от роботы отрывати.

В слідуючом числі напишу, як треба ся взяти до заложения дітячого садка, а тымчасом мамы надумайте ся добре над том, важном для вас справом.

Втічут с Австрии: Вдова по убитом перед пару літами через гитлеровцов австрийском канцлері Дольфусі хотіла перед пару днями достати ся до Чехословакии. На границі австрийско - чешской задержано ю разом с троима дітьми, с котрых найстаршого сынка несли на ношах. В товаристві вдовы по б. канцлері был французский консуль, котрого интервенция уможливила ей утечи перед гитлеровцами. Ей сын зломил ногу на нартах и находил ся в санатории коло Відня. Коли гитлеровскы войска заняли Австрию, сказано п. Дольфус, же дальше не може там остати.

Кроме ней выіхали до Чехословакии Куденгове Календжи, знанный пропагатор идеи паневропы, Цернато давный вице-министер, Штоскингер давный министер, князь Левенштейн и инши.

Час уж сіяти розсаду помидоров.

По війні поширила ся сильно управа помидоров и чимраз больше людей плекат у себе тоту пожиточну и смачну ярину. Помидоры вдають ся у нас добре и прото вартат их плекати. Овочи их сут смачны в суровом стані и мають много кормовых складників, особливо желіза. Помидоры дають ся легко перерабяти на соки и повила на зиму, котры дають нам пак смачны поливки и сосы.

Але помидоры потребує дост долгого часу вегетації и засаджены поздно не дозрівають на грядці, а дозрілы на окнах не мають уж того смаку. Вчасну розсаду можна собі са-

мому виплекати. В той цілі треба уж тепер посіяти насіне помидоров на розсаду. Кто має парник (инспект), тот робит того в инспекті. Але можна обійти ся и без парника и засіяти насіне помидоров в скриночках, штобы розсада росла в хыжі. Покаль не посходить, треба держати ю на пецу в теплі. Коли посходить, належит скринку дати на вигляд до сонца. На грядку садит ся розсаду помидоров рідко, што 1 метер, або найменше што 80 см. Помидоры роснут добре на людських отходах, змішаных с торфом.

Старайме ся ліпше гноити ґрунт.

Праві на каждом кроці слышит ся у нас наріканя на слабы урожаи. Бідкаме, же бракує нам зерна и паши, але не стараєм ся тому зарадити. Здає ся нам, же наш ґрунт єст так планний, же не дасть ся с него нич больше вытягнути. Тымчасом в дійсности так не єст. Земля у нас єст значно ліпша, як во всіх западных краях, лем же там стоить высье рольна культура. Люде робят там больше головом, а мы лем руками и показує ся, же робота головом дає ліпшы результаты. В Голяндии и Дании с 1 гектара зберают около 30 сотн. зерна, в Англии и в Німеччині — перешло 21 сотнаров, в Чехах — 17 сотнаров, а у нас и то на ровнинах, лем 9—10 сотн., отже меньше як половину того, што в Німеччині и Англии и 1/3 часть того, што в Дании и Голяндии. С того видно, же с ґрунту можна мати далеко больший хосен, лем треба знати коло него робити, треба уміти вытягнути с него користь. Без науки не потрафиме того зробити, бо если будеме так господарити, як родич и дід, то буде ся нам и так як им родило. Штобы вытягнути с него можливо найвысший хосен, мусиме конче познакомити ся со способами рациональной господаркы, доброй управы

поля и рационального навоженя. Того всего можеме научити ся лем через читане добрых господарских книжок и газет. Най никто на селі не скаже, же ему наука єст непотребна, бо хлоп потребує ей значно больше, як швец, кравец, коваль, и инший ремесельник.

Для старших можеме радити лем читане книжок, але молодши не повинни ся тым вдоволити. Они повинни ся горнути масово до рольничих школ, штобы в них здобыти теорытичны и практычны відомости, як треба провадити сельске господарство. Аж втотчас, коли в каждом селі буде двох-трех абсолюентов рольничих школ, коли тоты абсолюенты станут неяко инструкторами рольныма, поднесут ся наши села економично.

Тымчасом можеме дати лем одну раду. Дбайме о того, штобы мати як найбільше стаенного навозу, старайме ся, штобы тот навоз не высох ани не спарил ся занадто (не перегорі), не марнуйме гнояницы, але робме на ню особны ямы, где бы она стекала и не паровала, а уж поправит ся наша доля. Ґрунт знавоженный лучше, зародит лучше. Лука, поляна гнояницом, дасть больше травы и тот трава буде ліпша.

Найтяжше о три злоты.

Было то в одном селі. Але такы истории трафяють ся часто по наших селах. Сын ходил до школы и учил ся добре. Бракло однак грошей и сын не скончил школ. Сидит дома и приглядат ся домашной біді. Має дост часу и надумує ся, што бы дальше робити. Видит, же в селі позакладали склепы чужы люде и добре ся им жие. Хоче прото сам заложити склеп и сотворити для себе основы для дальшого жыту. Просит отже родичей, штобы ему допомогли. Знає, же не мають грошей, але в селі єст каса, в котрой дали бы ему пожичку, як бы родичи ся о того старали. Не иде того легко. Дост ся напросил и наплакал, аж наконец мати пошла до касы и довідала ся, же може достати векслеу пожичку, але мусят на векслі быти подписы трех газдов.

Зачали глядати ручителей и нашли. Здало бы ся, же тепер не буде уж ниякой перешкоды. Тымчасом выпало иначе. Каса жадає, штобы заряд гмины дал писемне потвердження, який маєток мають стараючи ся о пожичку и за таке потвердження треба заплатити по одному злотому от одного, разом три злоты.

Назначено день и ручители пришли до родичей старающего ся о склеп сына, штобы разом выбрати ся до уряду гминного.

— Слухай ле мамо — гварит отец — маш там дашто? Бо видиш, треба людей по-

шановати, бо так не гарді о ничом ити до войта.

Нашла ся флящина и якаси перекуска, а при пугарку розвязали ся и языки.

— Та оно бы вшитко было добре — радбым своей дітині помочи — гварит отец — лем одна біда, же тота оплата в гмині єст завысока. Дай чловеке 3 злоты и не знаш, чи дашто с того буде.

— Свята правда шваґре — подхватил ручитель Гриц, в нас то такы порядкы, же лем на каждом кроку старають ся здерти с хлопа скору.

— Так, так, гварил кум Онуфрий, всяди робят хлоп трудности. Але бо то и не нам брати ся до склепов. От знате преця Дмитрового Осифа, порвал ся на склеп и долго в нем сиді? Маєток потратил и мусіл склеп отступити другому, а сам тепер бідує. Я, не то, жебым был противный, але до склепу треба практыкы, бо то не штука на няня біду стягнути.

— Добре гварите куме, сказал отец, я сам того само все повтарям, але хлопчиско впер ся — склеп и склеп — а до того и бабу мі збунтувал и она также не дає мі спокою. Але, але — ту звертат ся до жены — принес ле ище одну фляшечку, бо видиш, же добры люде ся посходили и штоси урадиме для нашого хлопчиска.

Появилася на столі друга флящина, а с ным перешла бесіда на загальну хлопску біду, на податкы, на брак паши и т. д. Говорили уж тепер о вшитком, лем не о том, по што ся посходили. Гостинка потягла ся до поздной ночи и коли пак припомнули собі, же треба ити до гмины, было уж запоздно.

А весьо через тоты три злоты, котры треба было заплатити в гмині. Правда, гостинка коштовала штоси с десят злотых и нич не зроблено, але заощадили три злоты и сын сидит дальше дома.

Историй таких єст много по наших селах. Были бы они смішны, як бы через них не треба было плакати. Надумуючи ся над таким историом, приходит мимо волі на мысль, же родичи барз часто не розуміють своих обовязков в виду дітей. Они не хотят отворити своим дітям дороги до жытя. Ховають діти и не жалуют им, коли тоты діти женят ся. Втотчас, бер откаль хочеш, але гроши быти мусят. Треба преця и перед людьми показати ся, треба отже зробити „добре весіле“, треба сынови чи дівці и віно дати. И втотчас дають. Дають або гроши, котрых часто пожичають, або часть своего ґрунту, через што ослабляют свое господарство. Втотчас єст, бо мусит быти.

Але, як сын, або дочка хоче перед весілем обезпечити себе, як хоче он заложити собі якийсь варстат або склеп, втотчас звычайно сами родичи стають на перешкоді. Они не вірят, жебы молодой хлопец, неженатый в додатку, мог дати собі в жытю раду.

Ту треба нам конче присмотріти ся, як жиють инши народы, хоц бы и жида. Жид — отец дає уж малому сынови гроши до рук, штобы он научил ся нима обертати и звычайно выходит на том добре.

Мы также повинни так робити. Не на весіле, не на малый ґрунтик для дітей, але на промысл и торговлю повинни давати родичи дітям гроши. Як уж нераз мы писали, наш народ дає собі раду во всем. Наши люде не пропали, выїзджаючи до далекой Америки, а многы с них там закладали склепы, „бучерні“, „сальоны“ и т. д. и доробили ся на них маєтков. Нам не бракує таланту до торговлі, а бракує нам лем отвагы. На тоту отвагу мусиме ся здобыти, если хочеме переняти в свои руки торговлю и выдвинуты с біды наши села. Мусиме конче зарызыковати 3 злоты, о котры найтяжше!

Станиславов старат ся о латинске епископство.

Архиепископ Львовский латинского обряда др. Твардовский принял делегацию О. З. Н. с председателем округа станиславовского во главе: Делегация именем населения воеводства станиславовского обряда латинского зложила мемориял о просила предприняти акцию у церковных и світских властей в цілі утвореня епископства обряда латинского в Станиславові.

Архиепископ принял делегацию доброжелательно и прирек ей доложити старань для осуществленья их просьбы.

Чи дал ты уж жертву на Руску Бурсу в Горлицах? Если ні, то зроб того, як найскорше!!!

Што чути всвіті и в краю

Войсковы приготовлєня в Чехословакии. Прилучєне Австрии до Німеччини подїйствовало на Чехословакию пригнобляючо. Круги політичны, може без основаня, боят ся о будучность своей державы. Пригноблене взросло ище больше по выголошеной через Геринга бесіді в Берліні, котрой тон отчучо ту яко непосредну угрозу. Успокоила тамтешны політичны круги кус бесіда Гитлера, в котрой Гитлер заявил, што прилучєне Австрии не може быти небезпечно для Чехословакии, однак помимо того генеральный чешский штаб выдал зарядженя, стремячи до вскріпленя оружной силы.

Кытайскый маршал Чанг-Кай-Шек хворый. Начальный вожд кытайских войск, маршал Чанг-Кай-Шек ест тяжело хворый. Отновила ся ему рана, яку достал в часі прошлорочной револты ген. Лианга. Втотчас ранено Чанг-Кай-Шека и увязнено.

Выбух углевого мілу в броварі. В одном броварі в Нью-Йорку послідовал выбух углевого мілу в котловні. Выбух был так сильный, же ушкодил около 100 домов, стоячих недалеко. 4-ох работников ест забитых, а 20-ох тяжело раненых.

Выкрыте шпьянскій аферы в Англии. В початках того місяця выкрыто в Англии нову шпьянску аферу. Арестовано властительку фрызыерского закладу, котра ест оскаржена о крадеж важных тайных докумонтов войсковых.

В часі ревизии асыстовал офицер министерства войны. Потрафили выкрыти масу документов, относячих ся до широко розгалуженой шпьянскій организации.

Бандыцкый напад на почтовый транспорт. В среду вечером доконали бандыты смілого нападу на почтовый транспорт в Лиготі на терені Катовиц. В часі нападу убито стрілами полициянта Валаха, котрый ескортировал транспорт и зрабовано 6.500 зл. За бандытами заряджено погоню.

Выкрыте тайных горільнь в лимановском повіті. Державна полиция выкрыла в лимановском повіті 4. тайны горільні, в котрых вырабяно самогонку. Сконфисковано приряды до гнаня спирта и парунадцет литров готового уж спирта.

Оден с властителей тайной горільні, видячи надходячу полицию, хопил на плечи бутлю со спиртом и выбіжал задныма дверми в сторону ліса. Видячи, же женуть за ним полициянты и же не потрафит утечи, розбил бутлю со спиртом о дерево, штобы таким способом позбыти ся річевых доказательств.

Знищена половина кытайского войска. Японска агенция Домей доносит, што японскы силы в полудневой части провинции Шанси идут вперед. Японцы твердят, што в полном Кытаю знищено уж половину войсковой кытайской силы. В послідном місяці кытайскы втраты мали выносити 100 тысяч людей.

Познал перед смертю, же зле робил. Испанец Фернандо Еспинар был коммунистом и начальником войсковой вязницы в Альмерии. Он ненавиділ священников и власном руком выстрілял много духовных, як лем тоты наши ся в вязниці. Аж коли он тяжело захворил и чул, же буде жити уж недолго, отозвала ся в нем совість. Он почал молити ся цілыма днями и просил жену, штобы она покликкала священника, бо он хоче ся исповідати. Же-

на ходила даремно цілый день, священника не нашла, бо всіх выстріляно. Тым засмутил ся сильно Еспинар и почал молити ся горячийше. Помер, мовлячи молитвы.

Помер нартяр. Школяр с 5-ой класы народной школы во Львові С. Стыран издил на нартах по прильвовских горбках и упал так несчастно, же вбил собі кыйок до ока. Хлопчину отвезли до шпиталя, где умер по кількох годинах.

Килько золота мае Швайцария. Запас золота и девиз в национальном банку Швайцарии взрос до сумы 200 миллионов швайцарских франков. Мае она тепер наибольший запас золота, бо на одного жителя припадат 1.000 швайцарских франков, отже о половину больше як в Злученых Державах Полночной Америкы, где припадат на 1 человека лем 500 швайцарских франков. До такого маетку дошла гориста Швайцария через свою ошадность и господарность.

Купуют стары передвоенны австрийскы гроши. В Австрии ест окремый уряд, який мае выкрывати всі фальшивы монеты и банкноты, які появили ся в обігу. Недавно повідомлено тот уряд, же на чорных віденских биржах продают масово передвоенны австрийскы гроши. Тоты банкноты сут уж отдавна неважны, прото зродило ся подозрінє, же гандляры уживают их до výroбу фальшивых грошей.

В слідстві виявило ся, што всі австрийскы банкноты вывозили спекулянты до голяндских Индий. Полиция звернула ся до голяндской полиции в Батави по информации.

Виявило ся, што в голяндских Индиях, остало по світовой войні много австрийских банкнотов и што нашол ся там оден спрытний спекулянт, котрый почал их продавати тамтешным людям (Маляям), які вірили, што тоты образки мают якісь чародійны свойства и могут выратовати от всякой біды и несчастья. Голяндска полиция ствердила, што праві в каждой хаті висят на стінах австрийскы банкноты и што тамтешне населєне ест переконанє, што голова Фран-Осифа ест головом якогоси могучого султана.

Згоріла старинна церковь. В селі Грабіжнй зборовского повіта згоріла старинна деревяна церковь с XVII. столітя, великой исторично - музейной вартости с цілым урядженєм. Пожар повстал от незагашеной свічки на

престолі, от котрой запалили ся паперовы квіты. Вартость самой церкви выносит около 3.000 зл., а згорівшого урядженя около 8.000 зл. Однак далеку большу вартость представляла она исторично - музейну.

Прилетіли уж птахи. С теплых краев вернули уж дики гуси, жайворонки и шпаки. Люде повідають, же ворожит того скору весну. Але пасічники на Поморі запримітили, што пчолы вылітають уж с улиев и облітуют пасіку. Мае того ворожити на морозы и сніг.

Выгребли мур ложком и утекли с ареста. Володимір Романов и Стефан Сусь сидели в аресті в Винниках за крадеж. Мур в вязниці был негрубый и они ложками потрафили зробити в стіні таку дыру, што утекли. Тепер зловили их во Львові и осадили в Брыгидках. Мур там грубший и не так легко даст ся ложками выбрати.

Крадут и безчестят небожчиков. Францускы газеты доносят, же с собору в испанском місті Теруель выкрадено забальсмовану голову б. епископа Теруелю Мавроса, яку переховывали там от перешло 500 літ.

По опанованю Теруелю через войска генерала Франко, представители духовенства ствердили, што червєны выкрали голову.

Небывалый силач. В одной шведской місцевости живе 6-літний хлопчик, обдареный необычайном силом. Хлопец тот потрафит поднести до горы одним руком тягарок 50 кильовый, а двома руками 90 кильо. Лікары высказали ся, же хлопец розвиват ся совсем нормально, лем же мае необычайно сильно развиты мускулы. То буде даколи силач.

МОЛОДЫЙ с добром практыком организатор-инструктор хора церковного и світского добрый режисер, руководитель культурно-просвітительного житя читальні глядат занятя.

Условия по договору.

Адрес: Крыжановский Михаил, Бобрка
почта Лобозев, пов. Леско.

„РУСКЕ ПАЛОМНИЧЕСТВО”

составлене Алексієм Булка со Скварявы
выдане в Коломыи в р. 1906.

Писати до Админ. „ЛЕМКА”, Крыница 2.

Комунальна Каса Ощадности Повіта Краковского в Кракові

Рок основаня 1882.

ЦЕНТРАЛЯ КРАКОВ, УЛ. ПИЯРСКА 1.

тел. 115-97, 131-73, 101-03.

О т д і л е н я : К Р Ы Н И Ц А, тел. 112.

В Е Л И Ч К А, тел. 6.

Всі поручєня входячи в область банковости.

ПОРУЧЄНЯ ДЕВИЗОВЫ
ПОРУЧЄНЯ БИРЖОВЫ
СХОВОК АВТОМАТ.

СУМА ВКЛАДОВ ПОНАД 35.000.000 ЗЛ.
МАЄТОК ВЛАСНЫЙ ОКОЛО 6.000.000 ЗЛ.

БЕЗОПАСНОСТЬ.

ДОБРЫЙ ПРОЦЕНТ.